

清詩話

清
詩
話

全唐詩話續編弁言

甲午夏杪。以手鈔全唐詩話六卷。重付開雕。因憶余目之所見。集中有未盡搜羅者。遂信手拈而續之。凡原集載其人而遺其事者。續爲卷上。其人與事之俱未及載者。續爲卷下。案陳直齋書錄解題云。尤延之尙書家有遂初堂藏書。爲近世冠。是其采輯之富。有所自來。夫豈患掛漏與。擇焉既精。自不以多爲善。漫爲加輯。其能免續貂之誚乎。獨是李義府高駢之輩。編入集中。未嘗因人而廢。若經文緯武。忠義丕著。如張巡。爲有唐一代之偉人者。集中未見。不無遺憾。巡本盛唐人。茲取以冠篇。蓋儒者效法古人。仰如泰山北斗。當以志節經濟爲上。至所謂王楊盧駱當時體。輕薄爲文。哂未休者。殆卑之無甚高論也。審乎此。而讀全唐詩話。亦足爲座右之一助云爾。孫濤又書。

全唐詩話續編目錄

卷上

太宗

高宗

元宗

德宗

宣宗

武后

上官昭容

李嶠

蘇頲

王維

孟浩然

韋應物

李泌

顧況

盧綸

錢起

竇鞏

韓愈

張籍

歐陽詹

元稹

白居易

牛僧孺

劉禹錫

賈島

施肩吾

令狐楚

李賀

柳宗元

王建

鄭還古

段文昌

張祜

李商隱

溫庭筠

杜牧

許渾

李遠

趙嘏

薛能

方干

翁承贊

盧延遜

裴說

杜荀鶴

李濤

羅隱

鄭谷

李山甫

沈彬

僧齊己

僧貫休

魚元機

全唐詩話續編卷上

石門孫濤樂山續輯

無錫丁福保仲祐訂

太宗

太宗幸翠微宮。進士張昌齡獻翠微宮頌。帝愛之。初昌齡與進士王公治皆善屬文。名振京師。王師旦知貢舉。黜之。帝怪詰其故。對曰。二人雖有辭華。然其體輕薄。若置高第。恐後進效之。傷陛下雅道。帝善其言。

高宗

柳公權小說舊聞云。唐高宗承貞觀之後。天下無事。上官儀侍郎獨持國政。嘗凌晨入朝。巡洛水堤。步月徐轡。詠詩云。脉脉廣川流。驅馬入長洲。鵲飛山月曉。蟬噪野風秋。音韻清亮。群公望之如神仙焉。

元宗

開元傳信記云。明皇幸蜀。回至劍門。謂侍臣曰。劍門天險。自古及今。敗

全唐詩話卷之九
亡相繼。豈非在德不在險也。因作詩曰。劍閣橫空峻。鑾輿出狩回。翠屏千仞合。丹嶂五丁開。灌木縈旗轉。仙雲拂馬來。乘時方在德。嗟爾勒銘才。至德二年普安郡太守賈深勒于石。

雍洛靈異記云。明皇友悌。古無有者。嘗以書賜弟憲等。魏文帝詩曰。西山一何高。高高殊無極。上有兩仙童。不飲亦不食。賜我一丸藥。光輝有五色。服之四五日。身體生羽翼。朕每言服藥而生羽翼。寧如兄弟天生之羽翼乎。陳思王之才。足以經國。絕其朝謁。卒使憂死。魏祚未終。司馬氏奪之。豈神丸效耶。

明皇雜錄云。明皇初自巴蜀回。夜闌登勤政樓。倚欄南望。烟月滿目。因歌曰。庭前琪樹已堪攀。塞北征人尙未還。蓋盧思道之詩也。歌畢。卑中隱隱如有歌者。謂力士曰。得非梨園舊人乎。遲明爲我訪來。翌日。力士潛求于里中。召至。果梨園弟子也。其夜復乘月登樓。左右惟力士及妃侍者紅桃在焉。遂命歌涼州。涼州卽貴妃所製。親御玉笛爲倚樓曲。曲罷。無不掩泣。因廣其曲。傳於人間。

明皇御勤政樓大張音樂教坊王大娘善戴竿於百尺上爲木山狀瀛洲方丈命小兒持絳節出入其間舞亦不輟劉晏以神童爲秘書省正字年十歲慧悟過人召於簾中坐貴妃膝上爲施粉黛與戴巾櫛問晏汝爲正字正得何字曰天下字皆正惟明字未正貴妃令詠王大娘戴竿晏曰樓前百戲競爭新惟有長竿妙入神休謂綺羅翻有力還自嫌輕更着人

同前

德宗

廣卓異記云貞元五年置中和節德宗製詩朝臣奉和詔寫本賜戴叔倫於容州天下美之中和變梅柳萬彙生春光中和紀月令芳與天地長耽樂豈不尙懿茲特景辰庶遂亭育恩同致寰海康君臣永終始交泰符陰陽曲沼水新碧華池桃梢芳勝賞信多歡戒之在無荒

宣宗

蔡寬夫詩史云唐宣宗瀑布詩曰溪澗豈能留得住終歸大海作波濤王者之氣象可見

武后

廣卓異記云。武后遊龍門。命羣臣賦詩。先成者賜錦袍。左史東方虬詩成。設拜賜坐。未安。宋之問詩後成。文理兼美。左右莫不稱善。乃就奪錦袍衣之。其詞曰。宿雨霽氛埃。流雲度城闕。河隄新柳翠。苑上花初發。洛陽花柳此時濃。山水樓臺映幾重。群公拂霧朝翔鳳。天子乘春幸鑿龍。鑿龍近出王城外。羽從淋漓擁軒蓋。雲蹕纔臨御水橋。天衣已入香山會。山壁嶄嵒斷復連。清流澄徹俯伊川。塔影遙遙綠波上。星龕奕奕翠微邊。層巒舊長千尋水。遠壑初飛百丈泉。綵仗紅旗遶香閣。下輦登高望河洛。東城宮闕擬朝迴。南陌溝塍殊綺錯。林下天香七寶臺。山中春酒萬年盃。微風一起祥花落。仙樂初鳴瑞鳥來。花落紛紛更無已。稱觴獻壽烟霞裏。歌舞淹留景欲斜。石間猶駐五雲車。鳥旗翼翼流芳草。龍騎駸駸映晚花。千乘萬騎鑾輿出。水靜山空嚴警蹕。郊外喧喧引看人。傾心南望屬車塵。囂聲引颺聞黃道。王氣周迴入紫宸。先王定鼎三河固。寶命乘周萬物新。吾君不是瑤池樂。

時雨來觀農扈春

上官昭容

許彥周詩話云。唐高宗燕羣臣。賞雙頭牡丹詩。上官昭容一聯云。勢如連璧友。情若臭蘭人。觀此洵一英奇女子也。

李嶠

大唐新語云。李嶠字巨山。趙州人。少負才華。參知政事。封鄭國公。長壽中。則天鑄八稜銅柱。柱下置鐵山翁。仲師子麒麟圍遶。武三思爲文。朝士獻詩。不可勝紀。惟嶠詩冠絕當時。曰。轍迹光西崦。勳庸紀北燕。如何萬國會。諷德九門前。灼灼臨黃道。迢迢入紫烟。仙盤正下露。高柱欲承天。山頰叢雲起。珠疑大小懸。聲流塵作却。業固海成田。聖澤傾堯酒。薰風入舜絃。忻逢下生日。還遇上皇年。

明皇傳信記云。明皇將幸蜀。登花萼樓。使樓前善水調者登樓而歌曰。山川滿目淚沾衣。富貴榮華得幾時。不見而今汾上水。惟有年年秋雁飛。顧侍者曰。誰爲此。對曰。宰相李嶠辭也。明皇曰。真才子。不待曲

終而去。

蘇頲

開元傳信記云。蘇瓌未知男頲。有人獻兔。掛于廊廡間。召頲詠詩。乃曰。兔死彈丸。携來掛竹竿。試將明鏡照。何異月中看。由是稱爲小許公。

明皇雜錄云。京兆尹訪蘇瓌。既去。瓌令男頲詠尹字。乃曰。丑雖有足。甲不成身。見君無口。知伊少人。其敏捷如此。明皇問瓌草書難其人。誰可。瓌曰。臣不知其他。臣男頲爲文甚速。可備使令。然性嗜酒。幸免沉醉。足以了事。令召至。則酒未解。猶嘔殿下。命中貴人扶臥御幄前。明皇親舉衾覆之。既醒。援筆立就。明皇撫背曰。知子莫若父。

王維

史載維字摩詰。九歲屬文。與弟縉齊名。擢進士。官尚書右丞。工草隸。善畫。名盛于開元天寶間。寧薛諸王尊若師友。畫思入神。至山水平遠。雲勢石色。繪家以爲天機所到。學者不及也。兄弟皆篤志奉佛。食不

葦衣不綵。別墅在輞川。地奇勝。日與裴迪遊其中。賦詩爲樂。喪妻不娶。孤居三十年。又嗜古精音律。客有以按樂圖示者。無題識。維徐云。此霓裳第三疊最初拍也。客未然。引工按曲。乃信。代宗嘗語縉。朕嘗於諸王坐聞維樂章。今傳幾何。因遣中人往取。縉爲哀集數十百篇上之。

古今詩話云。王右丞好取人詩。如行到水窮處。坐看雲起時。此華英集中句。漠漠水田飛白鷺。陰陰夏木囀黃鸝。此李嘉祐句。大都誦古人詩多。積久或不記。則往往用爲已有耳。

孟浩然

史載浩然字浩然。任節自喜。隱鹿門山。年四十。遊京師。賦詩莫敢抗。張九齡王維亟稱之。維嘗邀入內署。俄元宗至。浩然匿牀下。維以實對。帝喜曰。朕聞其人。而未見也。何懼而匿。詔浩然出。帝問其詩。浩然再拜自誦所爲。至不才明主棄。帝曰。卿不求仕耳。朕何嘗棄卿。奈何誣我。因放還。已韓朝宗欲薦之。約與俱至京師。會故人至。浩然劇飲忘

約。或曰。君與韓公有期。浩然叱曰。業已飲。邊惜其他。自是卒不顯。初王維過郢。畫浩然像于刺史亭。因署曰浩然。咸通中。刺史鄭誠謂賢者名不可斥。更署曰孟亭。

韋應物

唐宋遺史云。韋應物爲蘇州太守。嘗有詩贈米嘉榮曰。吹得涼州意外聲。舊人惟有米嘉榮。近來年少欺前輩。好染髭鬚學後生。又嘗赴本州司馬杜鴻漸宴。醉宿驛亭。醒見二佳人在側。驚問其故。乃曰。郎中席上與司空詩。因令樂妓侍寢。問記其詩否。一妓強記。乃誦之曰。高髻雲鬟宮樣粧。春風一曲杜韋娘。司空見慣渾閑事。斷盡蘇州刺史腸。

古今詩話作
劉夢得詩

冷齋夜話云。韋應物琥珀詩曰。曾爲老茯苓。元是寒松液。蚊蚋落其中。千年從可覲。嘗見琥珀中有物形如蜂。此物自外國來。地有茯苓處。方生琥珀。

黃常明云。韋應物詩。心同野鶴與塵遠。詩似冰壺徹底清。又雜言送人。

云。冰壺見底未爲清。年少如玉有詩名。此可謂用事之法。蓋不拘故常也。

晉溪詩話云。韋蘇州身多疾病。思田里。邑有流亡。愧俸錢。余謂君子當切切作斯語。彼爲繭絲不爲保障者。得無愧此乎。

李泌

史載泌字長源。七歲能爲文。開元中。悉召能言佛道孔子者。相答難禁。中時員俶九歲。升堂。詞辨注射。坐人皆屈。帝異之。曰。半千孫固當爾。因問童子有類若者乎。俶跪奏。臣舅子李泌。帝馳召之。泌至。帝方與張說奕。因命說試其能。說請賦。方員動靜。泌逡巡曰。願聞其畧。說曰。方若棋局。員若棋子。動若棋生。靜若棋死。泌卽答曰。方若行義。圓若用智。動若騁才。靜若得意。說遂起。賀帝得奇童。帝大悅。曰。是子精神腰大于身。賜束帛。勅其家善視之。

顧況

南部新書云。顧況志尙疎逸。近於方外。時宰招以好官。況以詩答云。四

海而今已太平。相公何用喚狂生。此身還似籠中鶴。東望瀛洲叫一聲。

古今詩話云。況在洛。乘閒遊苑中。水上得大桐葉。有詩曰。一入深宮裏。年年不見春。聊題一片葉。寄與有情人。明日於上游。亦題於葉。泛之波中。曰。花落深宮鶯亦悲。上陽宮女斷腸時。帝城不禁東流水。葉上題詩寄與誰。十日餘。有客尋春苑中。又於葉上得詩。以示況云。一葉題詩出禁城。誰人酬和獨含情。自嗟不及波中葉。蕩漾來春取次行。

盧綸

丹陽集云。盧綸與吉中孚韓翃錢起司空曙苗發崔峒耿漳夏侯審李端皆能詩。齊名。號大歷十才子。憲宗尤愛綸文。至詔張仲素求其遺稿。綸集中往往有贈諸人詩。所謂舊錄藏雲穴。新詩滿帝鄉者。送中孚之詩也。引水忽驚冰滿澗。向田空見石和雲者。寄漳端之詩也。擁褐覺霜下。抱琴聞雁來者。同漳宿旅舍之詩也。風傾竹上雪。山對酒邊人者。題苗發竹間亭詩也。桂樹曾同折。龍門幾共登者。寄端峒曙

漳之詩也。司空曙亦有途中詩云。聽猿看楚岫。隨雁到吳洲。耿漳寄曙云。老醫迷舊疾。朽藥誤新方。李端寄綸云。熊寒方入樹。魚樂稍離泉。錢起答苗發龍池詩云。暫別迎車雉。還隨護法龍。又贈夏侯審云。詩成流水上。夢盡落花間。諸人更唱迭和。莫非佳句。蓋草木臭味既同。則金蘭契分。彌篤爾。史載郭曖進宮。大集名士。李端賦詩最工。錢起曰。素爲之耶。請賦起姓。端立賦錢一章。更工於前。起之妬賢徒增愧。而端之捷思爲可服也。

錢起

蔡寬夫詩史云。唐大清真宮使翰林學士錢起。多佳篇。人收起詩。不過百首。有錢蒙仲得江行無題一百絕。皆人家藏本所無。有云。霽雲疎有葉。雨浪細無聲。穩放扁舟去。江天自有程。又憔悴異靈均。非讒作逐臣。如逢漁父問。未是獨醒人。又烟渚復烟渚。畫屏復畫屏。引惹天末去。數點暮山青。又隄壞漏江水。地均成野塘。晚荷從不折。留取作秋香。

廣卓異記云。長慶二年。錢起自中書舍人知舉。放進士周墀及第。後同在翰林。會昌三年。起自僕射再放榜。時周墀任華州。因寄詩賀。叙同在翰林曰。文場三化魯儒生。二十餘年振重名。曾忝木鷄誇羽翼。又陪金馬入蓬瀛。雖欣月桂居先折。更羨春蘭最後榮。欲到龍門看風水。關防不許暫離營。答曰。貢院離來二十霜。誰知更忝主文場。楊葉縱能穿舊的。桂枝何必授清香。九重每憶同仙禁。六藝初吟得夜光。莫道相如不相見。蓮峰之下有龔黃。人以為絕唱。

後詩原集作王起和周侍郎見寄詩未知孰是

丹陽集云。錢起與郎士元齊名。時人語曰。前有沈宋。後有錢郎。然郎豈敢望錢哉。起中書遇雨詩云。雲銜七曜起。雨拂九門來。宴李監宅云。晚鐘過竹靜。醉客出花遲。罷官後云。秋堂入閑夜。雲月思離居。對雨云。生事萍無定。愁心雲不開。亦可謂奇句矣。士元詩豈有如此句乎。贈孟少府新除江南尉云。客路尋常隨竹影。人家大抵旁山嵐。題王秀友半日村別業云。長溪南路當群岫。半景東隣照數家。此何等語。余讀其詩盡。然未見有可喜處。以是知不及起遠甚。